


## Tinjauan Belanjawan 2026

**Buku Anggaran Perbelanjaan Kerajaan Persekutuan 2026** mengandungi penyata Anggaran Perbelanjaan Kerajaan Persekutuan yang merangkumi Perbelanjaan Mengurus dan Pembangunan bagi semua agensi Kerajaan Persekutuan untuk tahun 2026.

### Agihan Anggaran Perbelanjaan Persekutuan 2026

Sejumlah **RM421.20 bilion** diperakukan di bawah Anggaran Perbelanjaan Persekutuan bagi tahun 2026. Bahagian terbesar perbelanjaan tahun 2026 adalah di bawah **Perbelanjaan Bekalan** yang merupakan antara input utama Kementerian/Jabatan untuk melaksanakan program dan aktiviti yang dirancang pada tahun 2026 berjumlah **RM229.08 bilion (54.4%)**, manakala **Perbelanjaan Tanggungan** yang merupakan kehendak di bawah Perlembagaan Persekutuan berjumlah **RM109.12 bilion (25.9%)**. **Perbelanjaan Pembangunan** yang akan menjadi penggerak kepada memperkukuh pertumbuhan ekonomi bagi tahun 2026 berjumlah **RM83.00 bilion (19.7%)**.


**Carta 1 :** Agihan Anggaran Perbelanjaan Kerajaan Persekutuan bagi Tahun 2026



## Agihan Anggaran Perbelanjaan Mengurus 2026

Sejumlah **RM338.20 bilion** diperuntukkan bagi tahun 2026 untuk menggerak dan melancarkan pelaksanaan program dan aktiviti Kementerian/Jabatan. Perkhidmatan Awam merupakan input terpenting Kerajaan yang bertindak sebagai penggerak utama kepada pelaksanaan program dan aktiviti dalam menyampaikan perkhidmatan yang terbaik kepada rakyat. Oleh yang demikian, emolumen Perkhidmatan Awam Persekutuan disediakan peruntukan sebanyak RM109.36 bilion bagi tahun 2026. Pemberian dan Kenaan Bayaran Tetap disediakan peruntukan sebanyak RM186.62 bilion di bawah Perbelanjaan Mengurus.


**Carta 2 :** Agihan Anggaran Perbelanjaan Mengurus 2026



## Perincian Anggaran Perbelanjaan Mengurus 2026 Mengikut Sektor

Perincian Perbelanjaan Mengurus dipecahkan mengikut sektor yang merangkumi Sektor Pentadbiran, Sektor Ekonomi, Sektor Sosial, Sektor Keselamatan dan Sektor-Sektor Lain yang terdiri daripada Tanggungan Tertentu dan Bayaran Pindahan. Agihan Anggaran Perbelanjaan Mengurus 2026 memperuntukkan perbelanjaan terbesar di Sektor Sosial. Hal ini selaras dengan hasrat Kerajaan untuk memberi tumpuan kepada usaha dan tindakan meningkatkan tahap pendidikan, kesihatan, kebajikan dan kesejahteraan rakyat.

**Carta 3 :** Agihan Anggaran Perbelanjaan Mengurus 2026 Mengikut Sektor



## Perincian Anggaran Perbelanjaan Mengurus 2026 Mengikut Sektor Pentadbiran

**Sektor Pentadbiran** diperuntukkan Anggaran Perbelanjaan Mengurus berjumlah **RM16.81 bilion** dengan agihan kepada empat Sub Sektor seperti di **Carta 4**. Sub Sektor Perkhidmatan-perkhidmatan Am menerima agihan peruntukan tertinggi berjumlah RM15.00 bilion yang melibatkan anggaran peruntukan bagi tujuan penyelarasan, pengurusan dan pentadbiran. Peruntukan ini juga merangkumi perbelanjaan bagi kelengkapan bangunan yang menjadi keperluan pengoperasian Kementerian/Jabatan.

**Carta 4 :** Agihan Anggaran Perbelanjaan Mengurus 2026 Sektor Pentadbiran



## Perincian Anggaran Perbelanjaan Mengurus 2026 Mengikut Sektor Ekonomi

**Sektor Ekonomi** diperuntukkan Anggaran Perbelanjaan Mengurus berjumlah **RM22.08 bilion** dengan agihan kepada sembilan Sub Sektor seperti di **Carta 5**. Sub Sektor Pengangkutan dipertanggungjawabkan dengan peruntukan terbesar di bawah Sektor Ekonomi dengan peruntukan berjumlah RM7.21 bilion bagi perbelanjaan operasi yang melibatkan darat, laut dan udara. Hal ini adalah bertepatan dengan matlamat negara untuk mewujudkan sistem pengangkutan yang cekap, selamat, inklusif dan mampan. Selain itu, Sub Sektor Pertanian merupakan antara penerima peruntukan terbesar di bawah Sektor Ekonomi dengan peruntukan berjumlah RM5.02 bilion selaras dengan hasrat Kerajaan untuk mengukuhkan sektor pertanian bagi memastikan keterjaminan makanan yang mampan. Kerajaan juga akan menggalakkan pengeluaran produk-produk berasaskan pertanian yang bermutu dan bernilai tinggi bagi peluasan industri sokongan kepada Sektor Ekonomi secara keseluruhannya.

**Carta 5 : Agihan Anggaran Perbelanjaan Mengurus 2026 Sektor Ekonomi**




## Perincian Anggaran Perbelanjaan Mengurus 2026 Mengikut Sektor Sosial

**Sektor Sosial** diperuntukkan Anggaran Perbelanjaan Mengurus berjumlah **RM127.33 bilion** dan melibatkan pengagihan kepada lapan Sub Sektor seperti di **Carta 6**. Pembangunan modal insan pada semua peringkat merupakan tumpuan utama Kerajaan dalam setiap rancangan pembangunan negara dan ini diterjemahkan melalui pengagihan peruntukan terbesar di bawah Sub Sektor

Pelajaran dan Latihan dengan peruntukan berjumlah RM74.37 bilion. Kerajaan memberi penekanan kepada kepentingan akses sejagat untuk pendidikan berkualiti dengan memberi peningkatan tumpuan kepada pendidikan bakat untuk persiapan masa hadapan. Selain itu, Kerajaan masih kekal memberikan tumpuan kepada aspek kesihatan rakyat dengan memberikan perkhidmatan terbaik dan mudahcapai dengan kos yang rendah. Oleh yang demikian, Kerajaan memperuntukkan Sub Sektor Kesihatan dan Kependudukan dengan peruntukan mengurus berjumlah RM40.13 bilion, iaitu peruntukan kedua tertinggi di bawah Sektor Sosial. Hal ini adalah bertepatan dengan fokus Kerajaan untuk menyediakan perkhidmatan penjagaan kesihatan yang berkualiti bagi menjamin kesejahteraan rakyat.


**Carta 6 : Agihan Anggaran Perbelanjaan Mengurus 2026 Sektor Sosial**



## Perincian Anggaran Perbelanjaan Mengurus 2026 Mengikut Sektor Keselamatan

**Sektor Keselamatan** diperuntukkan Anggaran Perbelanjaan Mengurus berjumlah **RM32.72 bilion** dengan agihan kepada dua Sub Sektor iaitu Keselamatan Dalam Negeri sebanyak RM18.61 bilion dan Pertahanan RM14.11 bilion seperti di **Carta 7**. Peruntukan bagi Sektor Keselamatan bertepatan dengan peranan Kerajaan untuk memastikan kedaulatan dan keselamatan negara sentiasa dilindungi. Oleh yang demikian, Kerajaan tidak akan berkompromi dalam hal keselamatan demi memelihara nyawa dan memastikan keamanan negara sentiasa terjamin.

**Carta 7 :** Agihan Anggaran Perbelanjaan Mengurus 2026 Sektor Keselamatan



## Perincian Anggaran Perbelanjaan Mengurus 2026 Mengikut Sektor-Sektor Lain


Anggaran Perbelanjaan Mengurus yang disediakan untuk Sektor Tanggungan Tertentu dan Sektor Bayaran Pindahan berjumlah RM139.26 bilion seperti di **Carta 8** dan **Carta 9**. Sektor Tanggungan Tertentu diperuntukkan sebanyak RM100.89 bilion. Sub Sektor Perbelanjaan Kerana Hutang Negara menerima agihan peruntukan terbesar berjumlah RM58.30 bilion. Bahagian kedua terbesar ialah Sub Sektor Pencen dan Ganjaran berjumlah RM42.15 bilion.

**Carta 8 :** Agihan Anggaran Perbelanjaan Mengurus 2026 Sektor Tanggungan Tertentu



Sektor Bayaran Pindahan diperuntukkan sejumlah RM38.37 bilion dan diagihkan kepada empat Sub Sektor seperti di **Carta 9**. Sub Sektor Bayaran Pindahan Lain menerima peruntukan tertinggi iaitu berjumlah RM33.61 bilion di mana pembayaran bagi menampung subsidi antaranya subsidi produk petroleum.


**Carta 9 : Agihan Anggaran Perbelanjaan Mengurus 2026 Bayaran Pindahan**



## Arah Aliran Perbelanjaan Mengurus 2022-2026

Bagi tempoh 2022-2026, arah aliran Perbelanjaan Mengurus (termasuk pindahan lebihan hasil ke Kumpulan Wang Pembangunan) meningkat daripada RM294.30 bilion (2022) kepada RM324.62 bilion (2024). Peruntukan Mengurus bagi tahun 2026 juga meningkat berbanding tahun 2025 seperti di **Carta 10**.

**Carta 10 : Arah Aliran Perbelanjaan Mengurus 2021-2025**




Nota: 2022-2024 adalah merujuk kepada perbelanjaan sebenar manakala 2025-2026 merujuk kepada peruntukan asal

## Perbelanjaan Mengurus 2022-2026 Mengikut Sektor

Perbelanjaan Mengurus dibahagikan kepada Sektor Pentadbiran, Ekonomi, Sosial dan Keselamatan serta Tanggungan Tertentu dan Bayaran Pindahan. Bagi tempoh 2022-2026, perbelanjaan yang terbesar diagihkan kepada Sektor Sosial iaitu secara purata sebanyak 37.3% diikuti oleh Sektor Tanggungan Tertentu sebanyak 28.1%. Sektor-sektor lain menerima peruntukan seperti di **Carta 11**.

**Carta 11** : Peratus Perbelanjaan Mengurus Tahun 2022-2026 Mengikut Sektor




Nota: 2022-2024 adalah merujuk kepada perbelanjaan sebenar manakala 2025-2026 merujuk kepada peruntukan asal

## Agihan Anggaran Perbelanjaan Pembangunan 2026

Sejumlah **RM83.00 bilion** diperuntukkan di bawah Anggaran Perbelanjaan Pembangunan bagi tahun 2026. Pecahan utama Anggaran Perbelanjaan Pembangunan adalah seperti di **Carta 12**.


**Carta 12 :** Agihan Anggaran Perbelanjaan Pembangunan 2026



## Perincian Anggaran Perbelanjaan Pembangunan 2026 Mengikut Sektor

Perincian Perbelanjaan Pembangunan dipecahkan mengikut sektor yang merangkumi Sektor Pentadbiran, Sektor Ekonomi, Sektor Sosial, Sektor Keselamatan dan Simpanan Luar Jangka seperti di **Carta 13**. Agihan Anggaran Perbelanjaan Pembangunan 2026 memperuntukkan perbelanjaan terbesar di bawah Sektor Ekonomi bagi meningkatkan daya saing dan produktiviti melalui pelbagai projek yang sedang dan akan dilaksanakan sekaligus memperkukuh daya tahan ekonomi negara. Belanjawan 2026 akan terus mengutamakan kesejahteraan rakyat dan pembaharuan ekonomi yang menyokong pertumbuhan.


**Carta 13 : Agihan Anggaran Perbelanjaan Pembangunan 2026 Mengikut Sektor**



## Perincian Anggaran Perbelanjaan Pembangunan 2026 Mengikut Sektor Pentadbiran

**Sektor Pentadbiran** diperuntukkan Anggaran Perbelanjaan Pembangunan berjumlah **RM3.89 bilion** dengan agihan kepada dua Sub Sektor seperti di **Carta 14**. Sub Sektor Perkhidmatan-perkhidmatan Am menerima peruntukan tertinggi berjumlah RM2.95 bilion bagi membiayai projek-projek pengkomputeran dan naik taraf bangunan di Kementerian/Jabatan bagi memastikan penyampaian perkhidmatan kepada rakyat yang lebih cekap dan teratur.


**Carta 14 : Agihan Anggaran Perbelanjaan Pembangunan 2026 Sektor Pentadbiran**



## Perincian Anggaran Perbelanjaan Pembangunan 2026 Mengikut Sektor Ekonomi

**Sektor Ekonomi** diperuntukkan Anggaran Perbelanjaan Pembangunan berjumlah **RM36.78 bilion** dengan agihan kepada 10 Sub Sektor seperti di **Carta 15**. Kerajaan masih memberi tumpuan kepada pelaksanaan projek-projek kemudahan pengangkutan seperti lebuh raya dan pembinaan landasan kereta api dengan peruntukan sebanyak RM17.53 bilion diikuti dengan Sub Sektor Kewangan sebanyak RM4.30 bilion.


**Carta 15 :** Agihan Anggaran Perbelanjaan Pembangunan 2026 Sektor Ekonomi



## Perincian Anggaran Perbelanjaan Pembangunan 2026 Mengikut Sektor Sosial

**Sektor Sosial** diperuntukkan Anggaran Perbelanjaan Pembangunan berjumlah **RM28.59 bilion** dengan agihan kepada lapan Sub Sektor seperti di **Carta 16**. Sub Sektor Pelajaran dan Latihan menerima peruntukan tertinggi berjumlah RM14.45 bilion selaras dengan tumpuan Kerajaan kepada pembangunan modal insan. Selain itu, Sub Sektor Kesihatan dan Kependudukan turut menjadi tumpuan Kerajaan dengan agihan peruntukan berjumlah RM6.97 bilion. Kerajaan sentiasa peka dan prihatin dalam meningkatkan perkhidmatan sektor kesihatan memandangkan ianya berurusan secara langsung kepada rakyat.

**Carta 16 : Agihan Anggaran Perbelanjaan Pembangunan 2026 Sektor Sosial**



## Perincian Anggaran Perbelanjaan Pembangunan 2026 Mengikut Sektor Keselamatan

**Sektor Keselamatan** diperuntukkan Anggaran Perbelanjaan Pembangunan berjumlah **RM11.74 bilion** dengan agihan kepada dua Sub Sektor seperti di **Carta 17**. Sub Sektor Pertahanan menerima peruntukan berjumlah RM8.07 bilion melibatkan projek penyenggaraan berskala besar dan perolehan aset ketenteraan. Sub Sektor Keselamatan Dalam Negeri menerima peruntukan bagi membiayai projek-projek antaranya di bawah Polis Diraja Malaysia dan Jabatan Penjara Malaysia.

**Carta 17 : Agihan Anggaran Perbelanjaan Pembangunan 2026 Sektor Keselamatan**



## Simpanan Luar Jangka

Baki Anggaran Perbelanjaan Pembangunan berjumlah **RM2.00 bilion** disediakan di bawah peruntukan **Simpanan Luar Jangka** bagi membiayai projek pembangunan yang memerlukan peruntukan tambahan di luar jangkaan.


## Komitmen Jaminan dan Liabiliti Kerajaan

Daripada keseluruhan Anggaran Perbelanjaan Mengurus dan Pembangunan berjumlah RM421.20 bilion, sebanyak RM13.94 bilion diperuntukkan bagi membiayai komitmen jaminan dan liabiliti Kerajaan yang merangkumi bayaran *Public Private Partnership*-Unit Kerjasama Awam Swasta (PPP-UKAS) dan bayaran pinjaman yang dijamin oleh Kerajaan.

## Arah Aliran Perbelanjaan Pembangunan 2022-2026

Arah aliran Perbelanjaan Pembangunan bagi pelaksanaan projek/program untuk tahun 2022-2026 seperti di **Carta 18**.

**Carta 18** : Arah Aliran Perbelanjaan Pembangunan 2022-2026




Nota: 2022-2024 adalah merujuk kepada perbelanjaan sebenar manakala 2025-2026 merujuk kepada peruntukan asal

## Perbelanjaan Pembangunan 2022-2026 Mengikut Sektor

Perbelanjaan Pembangunan dibahagikan kepada Sektor Pentadbiran, Ekonomi, Sosial dan Keselamatan serta Simpanan Luar Jangka. Bagi tempoh 2022-2026, perbelanjaan yang terbesar diagihkan kepada dua sektor iaitu Sektor Ekonomi dan Sektor Sosial. Kerajaan sentiasa memberi keutamaan memperkukuh momentum pemulihan ekonomi, memperkukuh agenda pembangunan mampan serta mewujudkan perlindungan sosial yang lebih baik.

**Carta 19 :** Peratus Perbelanjaan Pembangunan Tahun 2022-2026 Mengikut Sektor




Nota: 2022-2024 adalah merujuk kepada perbelanjaan sebenar manakala 2025-2026 merujuk kepada peruntukan asal

## Pemetaan Anggaran Perbelanjaan Kerajaan Persekutuan Kepada Matlamat Pembangunan Mampan (*Sustainable Development Goals - SDG*)

Anggaran Perbelanjaan Kerajaan Persekutuan Tahun 2026 telah dipetakan kepada SDG bagi menyokong penuh hasrat Kerajaan menambahbaik tatakelola dalam penyampaian perkhidmatan dan merencanakan pembangunan negara yang komprehensif serta inklusif. Berdasarkan **Carta 20**, sebahagian besar SDG menerima peningkatan peruntukan pada tahun 2026.

**Carta 20 : Agihan Anggaran Perbelanjaan Kerajaan Persekutuan Tahun 2025 dan 2026 Mengikut SDG**



Nota: \*Tidak termasuk Simpanan Luar Jangka berjumlah RM2 bilion

Merujuk kepada **Jadual 1**, SDG 4 (Pendidikan Berkualiti) mencatatkan agihan tertinggi pemetaan Belanjawan 2026 kepada SDG iaitu sebanyak 20.6%, disusuli dengan SDG 16 (Keamanan, Keadilan dan Keutuhan Institusi) sebanyak 19.3% dan SDG 3 (Kesihatan dan Kesejahteraan yang Baik) sebanyak 11.7%. SDG 3 (Kesihatan dan Kesejahteraan yang Baik) merekodkan peningkatan tertinggi berbanding SDG lain dalam agihan Anggaran Perbelanjaan Kerajaan Persekutuan 2026 iaitu sebanyak RM831 juta. Peningkatan kedua dan ketiga

tertinggi adalah berjumlah RM765 juta iaitu SDG 1 (Tiada Kemiskinan) dan disusuli dengan SDG 10 (Pengurangan Ketidaksamarataan) sebanyak RM674 juta. Peningkatan peruntukan bagi SDG yang terlibat menunjukkan tumpuan utama Belanjawan 2026 adalah bagi menambahbaik kualiti pendidikan melalui pelbagai aspek termasuk menaik taraf fasiliti pendidikan, kebajikan pelajar dan akses bantuan kewangan bagi pendidikan. Penumpuan khusus juga diberi kepada usaha meningkatkan kualiti, taraf kesihatan dan kesejahteraan rakyat. Selain itu, Kerajaan sentiasa memberi perhatian dalam memastikan keselamatan, keamanan dan kedaulatan negara terjamin melalui pengukuhan institusi pertahanan, keselamatan dalam negeri dan penguatkuasaan. Seterusnya, fokus menangani kemiskinan dan sara hidup rakyat sentiasa menjadi agenda utama Kerajaan agar tiada rakyat yang keciciran dalam mengecapi kesejahteraan dan terus terpelihara kebajikannya.

**Jadual 1 : Agihan Anggaran Perbelanjaan Mengurus dan Pembangunan Mengikut SDG**

| SDG                |                                             | 2025                        | 2026             |              |               |
|--------------------|---------------------------------------------|-----------------------------|------------------|--------------|---------------|
|                    |                                             | Peruntukan Asal (RM bilion) | Syor (RM bilion) | Bahagian (%) | Perubahan (%) |
| Matlamat 4         | Pendidikan Berkualiti                       | 86.3                        | 86.5             | 20.6         | 0.3           |
| Matlamat 16        | Keamanan, Keadilan dan Keutuhan Institusi   | 80.1                        | 80.7             | 19.3         | 0.8           |
| Matlamat 3         | Kesihatan dan Kesejahteraan yang Baik       | 48.3                        | 49.1             | 11.7         | 1.7           |
| Matlamat 10        | Pengurangan Ketidaksamarataan               | 46.8                        | 47.5             | 11.3         | 1.4           |
| Matlamat 9         | Industri Inovasi dan Infrastruktur          | 36.8                        | 37.2             | 8.9          | 1.0           |
| Matlamat 8         | Kerja Wajar dan Pertumbuhan Ekonomi         | 32.3                        | 32.6             | 7.8          | 0.7           |
| Matlamat 11        | Bandar dan Komuniti Mampan                  | 27.3                        | 27.5             | 6.6          | 0.6           |
| Matlamat 1         | Tiada Kemiskinan                            | 11.9                        | 12.7             | 3.0          | 6.4           |
| Matlamat 2         | Kebuluran Sifar                             | 9.5                         | 10.2             | 2.4          | 7.1           |
| Matlamat 17        | Kerjasama Demi Matlamat                     | 5.7                         | 6.3              | 1.5          | 10.8          |
| Matlamat 6         | Air Bersih dan Sanitasi                     | 9.6                         | 6.2              | 1.5          | (35.6)        |
| Matlamat 13        | Tindakan Iklim                              | 5.2                         | 5.3              | 1.3          | 2.8           |
| Matlamat 7         | Tenaga Mampu Bayar dan Bersih               | 4.6                         | 5.1              | 1.2          | 10.9          |
| Matlamat 12        | Penggunaan dan Pengeluaran Bertanggungjawab | 4.4                         | 4.8              | 1.1          | 9.6           |
| Matlamat 5         | Kesaksamaan Gender                          | 3.6                         | 3.8              | 0.9          | 6.5           |
| Matlamat 14        | Hidupan Dalam Air                           | 4.0                         | 2.0              | 0.5          | (49.9)        |
| Matlamat 15        | Hidupan di Daratan                          | 4.6                         | 1.7              | 0.4          | (62.5)        |
| JUMLAH KESELURUHAN |                                             | 421.0                       | 419.2            | 100.0        | (0.4)         |

Intihanya, pemetaan ini adalah selaras dengan Kerangka Ekonomi MADANI yang komited dalam menaikkan lantai untuk meningkatkan darjat hidup rakyat dengan menaikkan siling melalui penstrukturan semula ekonomi sekali gus mencapai sasaran lebih tinggi ke arah Malaysia sebagai peneraju ekonomi Asia.

## Anggaran Peruntukan Pemberian Kerajaan Persekutuan Kepada Kerajaan Negeri Tahun 2026

Pemberian dan bantuan kewangan Kerajaan Persekutuan kepada Kerajaan Negeri disediakan di bawah Anggaran Perbelanjaan Mengurus yang merangkumi 13 jenis pemberian dan bantuan yang dianggarkan berjumlah RM10.26 bilion bagi tahun 2026, meningkat sebanyak 4.4% berbanding tahun 2025 (RM9.83 bilion).

**Carta 21 :** Agihan Anggaran Pemberian Kerajaan Persekutuan Kepada Kerajaan Negeri Tahun 2026

